

摛藻堂四庫全書薈要

集部

欽定四庫全書

家藏集卷二十七

集部

明 吳寬 撰

詩六十六首

春山圖

平野春雨過危峰殊秀發玉女洗頭罷端如盤鬢髮高
人携筇行似畏溪橋滑結伴是何時松林間採蕨

送戴員外出守桂林

子有長才早致身仕途隨處是通津六千里外桂林郡

十五年前杏苑人出守要知從古重作官何幸與民親
昌黎亦羨登僂去詩裏驂鸞句尚新

送張光祿時達還南京

早入工曹績用成徊翔又作北都行長才未展猶閒地
留務能分已列卿言論高來通世故須眉蒼盡好風情
傍人莫怪南歸速春色遙追到石城

賀成國夫人胡氏七十

畫戟門深翠幙重北堂春酒色初濃江南秀出名臣裔

天上榮加大國封僂錄載頌人跨鶴海圖親獻客乘龍
百年將種能供養高廩長盈祿萬鍾

盆中桃花一本而緋碧二色

小圃喜多春色繁花一併斑斑紅霞映水將落白雪當
牆可攀坐亂老人鬚髮行驚醉客容顏二喬臺上連臂
不數唐家玉環

送王汝英南歸

尺疏陳情入舜宮御批真喜徹重瞳銀臺異寵曾加秩

全匱奇才屢奏功家食固知千指衆友懷皆說一心同
銅官山色渾如舊畫錦煌煌在目中

送邵國賢

簿書錢穀歎徒勞提學俄聞出戶曹都下文名如子少
江西學政是誰高璽書耀日懸霄漢驛舫乘風壓雪濤
自古賓興先六行不將小技望賢豪

送白太傅致仕

玉敕新承墨未乾都門行色萬人看法曹屢奏三年績

恩旨重加一品官勝地扁舟行樂健故人尊酒過從歡
不須更入香山去自有西園八節灘

送冢宰屠公致仕

皇朝出入著勤勞未老頭顱有二毛遷秩兼聞離憲府
收功仍喜在銓曹天章笑捧新頒敕晝錦榮披舊賜袍
更向人間誇至樂登堂日日獻春醪

園中行讀白集

北齊坐後又西軒挾冊休將比兎園每託心情常託物

已忘官職未忘言吳中故郡荒烟積洛下幽居宿草蕃老至一編空在手燕山留滯媿高騫

新月

新月如少女靜娟凝晚粧亭亭朱樓上隱隱銀漢旁桂樹未全長玉兔在何方自然多思致何必滿容光黃昏延我坐檐下施胡牀遂爾成良會清風復吹裳願言常不負莫學參與商

園中夜步

曳履孤亭側披襟小徑前藤垂風獨細樹隱月難圓散
秩朝非懶閒居病易痊老年無著作只擬錄歸田

同年會予以病不赴簡席間諸公

新秋良會禁城西獨坐公堂未得躋三客預期非不速
十人堪歎亦難齊情親只託詩筒送體弱誰將藥裹齋
向晚涼生還坐想不知若箇醉如泥

送工部徐尚書以病乞歸加太子太保致仕

中外勤勞四十年平生晚節更能全身登八座官殊重

名列三公位獨專敕捧龍章天日近衣裁麟角海雲鮮
肩輿日日何妨出故里看山有宿緣

送禮部徐尚書加太子太保致仕

玉帶橫腰喜氣新賜歸爭看越精神史官早授為前輩
聖主疇咨念老臣賜谷卜居真有地南宮增秩更何人
亦知恩重難忘報夜夜山中禮北辰

送倫修撰文序父南還

萬里南來繫一舟綵衣春酒動離愁魁山黎水雖堪住

赤縣神州也合游晚市緇塵仍觸暑月林清影忽驚秋

朝家恩典三年事闕下親承願少留

為毛憲清題花竹圖

憲清有祖百歲生於二月

繁花匝地凝春色脩竹凌空傲歲寒共向生辰呈秀麗
偏于晚節報平安中朝有待賢孫至東海須將大老看
白髮烏紗添入畫漢家恩詔定加官

送李世賢赴南京禮部侍郎

史局文場滯此身高才初喜試經綸東朝侍從踰三載

南省追陪只二人雲起望家虞阜曉花開退食秣陵春
都門醉別遙揮袂且脫京華昧日塵

題沈良德送行圖

不用高歌陟岵篇賜歸真慰母心懸翟冠自送雙笄總
綵服重裁兩袖翩九世簪名多積德一門科第總稱賢
吳中秋到慈闈啟盡說宜將盛事傳

翰林送李世賢

都門無計可留公況是秋來有便風尚憶陸機游洛下

莫疑張翰向江東，詞林前輩晨星少。
鄉社無人海月空，定有天書還召入。
暫將留務託南宮。

九日風雨二首

滿城風雨重陽日，何處重登戲馬臺。
丹闕入朝衣盡濕，

玉堂置酒席難陪

是日翰
林設宴

牆邊赤棗憐俱落，籬下黃花

恨未開安得吳門蓑笠叟，芙蓉江上送魚來。

滿城風雨重陽日，平地江湖大漲時。
木偶自漂應去遠，麵生不召故來遲。
人間紀事兼詩話，座上傳神滿鬚絲。

何物報晴真可喜喧喧鳴鵲在槐枝

早寢

老去貪眠負月華不知夜景到秋嘉疎篁倚石還搖影
叢桂遮堂定着花吟就挑燈當別館夢回搗練是鄰家
如何七十年將近猶踏朝門聽鼓撾

謝葉惟立送菊

園門歲晚只常關忽送幽花滿目斑天意故教秋色好
世情不使物華閒臨風醉酒憐人老傍徑編籬恨地慳

賴有疎篁為伴侶平生高節總難攀

送陳德修擢南京右都御史

百年京鎬設南臺門對鍾山紫翠堆留務遠分承寵命
舊章重整見高才豸冠戴向風前正鷁航行從水際開
便道過家誰不羨鄉人爭看錦衣回

送何道士授都紀還鎮江次沈石田韻

鶴馭雲中來北固霞裾塵外別東華名題金闕分僊袂
蹟寄丹山離俗家鴻寶記長當吏牘玄都觀古即公衙

天寒歸路清如許
藤六前驅撒玉砂

藤梢

藤梢繞籬落黃葉照清池
屬當秋氣盡欲落已先萎
寒風既披拂微雪復點之
坐見憔悴色不復如前時
感之重歎息人老良可悲

雪後入朝

天門晴雪映朝冠
步澁頻扶白玉闌
為語後人須把滑
正憂高處不勝寒
飢烏鵲死應餐
盡馴象當庭又踏殘

莫向都人誇瑞兆近郊或恐有袁安

次韻韓貫道送濟之以冬至謁陵

公事驅人更莫辭亦知不是翰林時同行尚憶匆匆去
暫別猶勞耿耿思百里向前瞻漢廟五陵依舊入唐詩
年來喜識荆南面相送惟應少酒卮

謝濟之送橘次舊韻二首

味甘不用兩眉攢種得成林合棄官食後不將皮核棄

扶衰人說比僂丹

嘉惠恭承又滿盤牛車雪滑到應難糖囊莫道名非稱

入齒冰漿信不酸

又次韻謝送銀杏

綠葉叢叢鴨腳攢霜前摘取屬園官無花結實猶堪食
羞殺花王是牡丹

玉子纍纍走大盤老人手種食應難閩南橄欖形雖似
待得回甘已受酸

楊應寧携畫冊過園居相示已而雪作

園居寂寞掩柴扉詩客從容出禁闈遙聽鶴聲初出迓
頻瞻馬首莫言歸臨窗看畫忘呼酒據地圍爐試解衣
寒氣逼人將日暮不知林下雪花飛

聖駕郊壇看牲次玉汝韻

天寒迎駕作郊行道院呼僮洗玉觥石鼎不逢狂道士
銅爐還餉老門生投來濡肉匏無俎雜以枯魚煑似鯖
須是石湖風雪夜蓬窗吹火叙同盟

生日

人皆遇除夕我復臨生朝舉頭望七十前去三載遙信
哉百年內行步為下橋早衰視茫茫面髮且蕭蕭安能
如松柏歲寒還後凋衰頹固老態加以病相撓但勝陌
上花易逐風沙飄所愧職業曠難免素餐嘲清秩徒兼
授黃金自橫腰盤南開別業舊約負漁樵更念丘壠隔
悲愴尤無聊孤燈對臥榻轉展至中宵

談命

有客能談命言予運正通運通亦何事爵位當日崇客

言與吾意所見頗不同凡今登仕者命服華其躬人徒

見其美

闕

入朝恒惴惴臨事惟忡忡官秩久

益進職業愈難供王法或幸免清議安能容一朝奉身

退憂患頓若空趨朝謝車馬睡足日頭紅田園日以涉

山水任所窮出門無禁制開口無災凶樂哉難具述林

下始收功吾生果有命歸去在吳中

正月十三夜與鄉友會飲

繞簷星月帶明河佳節相逢宵易過合郡幾人常減少

流年如我獨加多
畫屏重展銷銀蠟
春酒爭持蕩碧波
正是金吾初弛禁
下堂休問夜如何

十五夜赴天涯飲

折燈光起透藤絲
偏與西堂雪月宜
故事上元初放假
新年三日預為期
老人正爾思吳俗
童子何堪唱楚詞
醉後再傾紅粟酒
神情深渾忘出門
遲

次韻李諭德生子志喜

紫禁朝回步雪中
傳聞吉語信非空
懸弧在戶彎如月

桂綵當筵爛若虹上日邀賓須歲滿中年為父豈途窮
李年五十四如何識此真堪喜我憶平生事頗同

為錢副郎世恩題桂兔圖

懸崖碧樹爭倒垂金釵亂揷還參差古香能受秋風吹
亦復有藤縷絡之洞門一似蓬僊姬身纏寶瓔墜朱綾
其下何物趺坐危赤睛玉毫光陸離長耳聳起分兩歧
視而孕焉覩是兒惟上有物揚清暉團團冰鏡一尺圍
人名為月非此誰月中桂滿兔且肥信哉有影乃在斯

歷觀畫記從新施收藏莫盛宣和時高格雅淡今何稀
黃筌趙昌曷不師素面朝天誇虢姨市娼塗抹衆所嗤
鶩然展觀亦甚奇翩翩五色斑斕衣

傅水部索石田玉洞桃花圖寄壽乃兄宗伯

傳說騎箕上天去傳巖于今在何處翠倚西江干仞高
玉笥山前子孫住一溪流水漱雲根萬樹桃花遮洞門
胡麻飯逐落紅亂宛然此地武陵村主人自是青雲器
去作玉皇香案吏不須手拍洪崖肩水部郎官是難弟

勞書寄語山中人少遲歸來三百春妙手誰能移壽域
分分只在人間世

盆中紅梅二首

盆裏孤根強屈蟠低枝老硬欲凌寒不隨桃杏供人目
顏色生來自渥丹

坐見荒園二月過莫瞻春色在喬柯分明一段江南景
日暮頻將老眼摩

送汪太守致仕

吳學猶傳舊教條南來別駕路何遙上章忽入新關報
增秩仍為大府僚老去烏紗常在首閒來金帶已橫腰
人生止足誰知得鄉里高名豈自邀

送楊太卿應寧赴南京

太卿樓船向何處直到石頭城下住江上人迎訪故廬
堂前我憶瞻嘉樹南人只愛江南行江南樂多無宦情
何如去家只百里黃金橫帶為清卿老我平生忝知己
不得相從附船尾客居初沾燕子泥官河忽漲桃花水

金陵本是帝王州
高臺依舊鳳凰游
知君到日好詩興
佳句從今無李侯

齒痛

日者齒病作病起吾莫知知之亦甚易年老理固宜憶
當七八歲正值毀齒時齒落乃復生如艸雜即滋今勢
且欲落既落生無期又如枯樹然安能發新枝落亦不
自愛獨何以痛為使彼無所痛盡落奚足悲夫豈若韓
子計歲以數之何況舌自存而復食無虧吟聲雖函胡

尚可和吹簎食物雖齟齬尚不廢含飴但使痛除去此外不求醫

輓毛伏羌

早持一劖策奇勲忠勇平生亦罕聞象應星辰通上將氣驅貔虎冠三軍捐軀報國懷方略進爵酬勞著誥文當寧只今勞北顧誰令頗牧起丘墳

送史引之知隨州

儒者之餘事纘言以為文古人嘗有言文章能潤身君

昔在閭里誦習殊精勤浮俗志莫奪翩然曳儒紳稍長
取鄉貢謙抑愈恂恂蹉跎二十年賢名只如新昨欲就
常選懶看曲江春同輩爭勸留顏色自欣欣入仕非一
路期以澤吾民我志乃在此科甲真淺論銓試出緒餘
冀馬竟空羣楚邦非險遠民風更清淳宋賢讀書處遺
蹟想應存此地初為守平生志方伸三年成美政吾老
猶當聞

送馬學士良佐還南京

院事清閒不下堂手披竹簡置銅章虞廷初考為三載
馬氏重聞有五常官到鎬京諳典故地通岷水接家鄉
南風又引扁舟去一振塵衣上鳳岡

送宋郎中出守廣信

水部才名滿數車向來相識自京華雲間接壤為鄰郡
江右分符得過家庭旆微沾秋野雪櫓檣高入晚汀霞
親民長策今須展故里誰將畫錦誇

園居二首

朝回當暑葛衣輕影過清池浴鳥驚種得玉延纔出土
客來何物可為羨

靜處誰兼吏隱名名兼况有老儒生却憐一畝幽棲地
百里吳山不會行

追和朱樂圃先生蘇學十題

有序附後

泮池

半形循學舍一水轉松林盛矣來多士依然廣德心跨
橋方覺濶垂釣不知深此地名龍腦揚波願作霖

玲瓏石

奇特非常品來從建學前久為錢氏物中有洞庭天輕
比濱浮磬溫須玉出煙菱溪何足記想見狀頑然

百榦黃楊

嚴凝霜雪後蕃衍弟兄同帖莫題青李刀難斷寸葱厄
多逢歲閏材短謝良工桃李紛如許終看立下風

公堂槐

密葉連街上孤根寄學中名揚蘇子記陰覆魯侯宮既

久今何在惟喬自不同曾沾時雨化多幸遇朱公

辛夷

莊周稱散木形狀獨離奇名在誰多識花開每及時鳥窺無可食虫蝕也須醫作筆應全誤紛紛落研池一名木筆

石楠

泮水根常溉臨池路不遙顧瞻依曲檻愛護障輕綃別種為交讓香楠為
交讓木終年亦後凋有材非爨用斤斧免山樵

多榦柏

新甫傳遺種吳門見後昆碧霄多直榦黃壤本同根霜
雪持高節莓苔接古痕三年非檜木十畝自陰繁

竝秀檜

講堂前竝立霜雪傲玄冥此樹今猶在常年不改青雨
來添秀色風動散微馨科第能相繼題名下有亭

新杉

生為松柏類不逐歲寒凋弱質蒙春雨高情薄紫霄諸

生沾賸馥巧匠待長條此日材當大初裁自宋朝

泮山

少小游歌地升堂步未窮移山元費力覆蕡竟成功狹徑埋芳艸孤亭納暑風登高誇壯麗興學念文翁

蘇自宋有學景祐初范文正公來典鄉郡延安定胡先生為師繼之者為樂圃朱先生公既名臣二先生又良師皆一時人才造就遂盛于天下學故吳越錢氏南園也規制宏壯遠去市井山水之勝嘉樹奇石

錯植其間宛然林壑也舊有十題曰泮池玲瓏石百
榦黃楊公堂槐辛夷石楠龍頭檜蘸水檜鷗足松雙
桐至樂園掌教時已亡其四先生乃益以多榦柏竝
秀檜新杉泮山而十題復完今去當時已數百年獨
泮池泮山尚在而講堂前二檜疑即竝秀若奇石固
有不知其孰為玲瓏也寬為童子入學固不知十題
之名獨見國朝士大夫詠學中諸景詩石刻然皆非
十題之舊矣比寬自在都再入翰林專掌誥敕暇日

得閱秘書而樂圃集在焉見十題之作而先生自叙其前尤詳乃悉次其韻一過夫今之學遭賢郡守屢加興修規利益勝然所謂諸景又亡其三四矣况數百年以前者乎故既和其詩復序其事庶其物雖亡而其名猶存後世亦有考焉爾辛酉五月既望序

為崔太卿題史都憲墨竹

容臺有地堪種竹北土高寒數根足未許長竿可釣魚
况云美筍能燒肉太卿好竹如好僊夜夢時時游渭川

醒來忽見竹滿壁墨痕濕處何蒼然彷彿庭前秋月白
影落旁枝猶百尺化龍只恐起清波棲鳳却疑依巨石
人間酷暑何時徂對此翛然暑氣無伊誰能事寫此圖
人云中臺史大夫

為錢僉憲題二士圖

二翁吾不知為誰晚來共坐崖石危一翁攘臂方談詩
一翁抱膝如有思平湖萬頃渺風漪隔岸蒼山脚下垂
巖姿樹色望忽斷正是白雲初起時吳中山水正如此

震澤洞庭天下奇更教此地看明月萬鍾千駟將何為
我欲徒步往從之只恐二翁嫌我是俗客塵衣不使汙
崖石

題石田畫卷寄沈時陽

松林晝靜人獨行隔林似聽吾伊聲春山滿眼發蒼潤
知是曉來初雨晴南望荆溪溪上路路繞長松千萬樹
太湖蕩漾映高門此是荆溪長往處何人能棄冠裳歸
只向松陰覓詩句便欲從之未有期清夢時時此中去

石田高士臥東林故寫長圖慰我心封題却附湖船上
只恐雲深無處尋

家藏集卷二十七



總校官庶吉士臣侍朝
校對官主事臣張培

謄錄舉人臣郭履元
謄錄監生臣張永浙

欽定四庫全書叢要

集部

家藏集卷二十八至三十



詳校官候補通政司經歷臣郭祚熾

欽定四庫全書薈要卷一萬六千七百五十七

集部

家藏集卷二十八

明 吳寬 撰

詩八十七首

題謝鳴治歸來園

新開山下園古村纔得數家存經心勞止多閒事

遺腹嶄然有長孫栗里

陶淵明作

晁家千

晁以道號歸子有濟北集

晁以道號歸來
子有濟北集

主人莫作終焉計召命臨門

敢負恩

次前韻懷故園

老夫亦自有東園，因賦歸來若日存。
久負木鐓歌杜子，何妨布被笑公孫。
別來漸覺清風遠，坐處常思白石溫。
便逐秋波放舟去，時人莫漫笑忘恩。

鳴治新修國學朝房雨夜宿此有作次韻

笑揮公帑百金餘，輪輿驚看勝舊居。
一日葺來猶故事，兩山占斷豈吾廬。
鳴治家有
兩山書院夜中風雨題詩滿天下，
河待漏初廣夏仍思庇寒士。先生才調未全疎。

久借內閣朝房次前韻

詞林再入歲周餘自笑東方久借居漢代雖多閒祿秩
吳門幸有舊田廬高眠齋榻春回後慣着朝衣日出初
天念老人仍借景隔牆嘉樹綠扶疎

寄壽太宰尹公八十

有序

恭惟太宰尹公天下達尊濟南遺老寬辱愛
頗久奉問獨疎徒因微末之嫌恐致率易之
詣幸三朝之耆舊功業既成屬八袞之高年

體履益勝聊陳韻語因寄下懷敬祝期願以

慰衆望

廊廟久違思舊德山林何幸着名卿臨湖對月將杯舉
出郭看花却杖行楊綰在朝風俗美山濤典選品流清
濟南耆俊從來有坐見高年過伏生

盆荷初開適值風雨對之感歎

一面紅粧擁翠盤風風雨不勝寒園門半掩無人到
我獨憐渠只自看

代荷花答

淡紅數瓣出天然根託盆池強自連風雨滿園香更遠
無人來看不須憐

園中即景二首

竹陰日暮意翛然山石依依共晚年白槿數枝相映好
似將顏色弄清妍

萍藻多從雨後生綠波常共小池平朱藤覆滿休輕剪
待看繁花映水明

雨後移竹

人言種竹須雨過何況移來雨仍大此君此日館吾家
攜酒客來爭作賀早年憶與竹相親到此頻裁凡百箇
晨澆暮灌常不活猶怪園丁何懶惰其密如簣今兩叢
東鄰分得肩難荷長鐃依然白木柄手種任為泥所涴
虛亭掩映翠色新使我對之終日坐簷前有地繞丈餘
覆以清陰誰敢唾尋常豈乏涼颸生日午風清俄遠播
歐公曾云涼竹簟酷暑可逃當此臥頗似吳中顧辟疆

獨許獻之登上座望塵不作金谷趨高節應甘首陽餓
平生何故取於斯正為冰霜莫能挫京都百物皆有之
自笑當居此奇貨敲門只恐人借看林下蒼苔輕踏破
從今艸木俱等閒當以竹題為日課試將竹榜揭園居
客到先將此篇和

園北新構板屋制甚樸陋濟之有作次韻答之
古詩載板屋遺制千載下嗟我同心人在其是誰者江
南想猶無都下知更寡匠巧免刻楹童頑難毀瓦中虛

亦生白外美聊飾赭夜宿惟僂禽朝奔無野馬葦席平
可眠荆墩矮宜坐緣木構增巢避風停舡舟困疑乃
倉渠渠愧非夏雨漏痕在壁月窺光落岸仍勞詩家詠
不待畫工寫其如功省何從此價增也

濟之再和復次韻

退食初自公我常在其下凡此連牆居孰是無椽者價
直既甚廉規模亦殊寡成風勞運斤禦雨謝陶瓦農家
費索綺甲第自塗赭似巢宜借鳩非旣休畜馬打頭忽

欠伸結趺從起坐車停難傾蓋柁捩莫旋舸向陽緣度
冬當暑却忘夏負暄兼看書臨水還洗葦倘有王維來
當為魏野寫景勝實類之言大非誇也

濟之三和復次韻

古人為宮室棟上而宇下異哉方舟如吾豈作俑者萬
間與一廛勿復論多寡暖日忽上階烈風免飄瓦維此
湘山材曾遭始皇赭公來價十倍伯樂同相馬舉杯更
相屬試說再延坐敝巷舊得名居民業拆舸近市物預

儲爰自去年夏辛勤始有此豈易陳一竿病體強棲遲
中抱聊自寫樣陋何足誇前言真戲也

偶閱白集有東園玩菊之作今歲小園菊開頗

盛輒復次韻

今歲置秋閨又見秋將闌客居貯秋色幸復有東園凡
今百種花孰不畏天寒胡此爛斑者節去猶未殘瓦盆
圍板屋每坐于其間玉韞既高墜金錢更相連東籬偶
采菊不為花所牽豈如陶翁高見山獨悠然我欲學此

翁無菊非所難翁如欲學我無酒却鮮歡園有松與竹
秀色同新鮮呼之作三友庶以怡衰顏

有感效白體

吾秩殊不卑已作三品官吾壽亦不少已望七十年官
卑何足計壽少真可憐不見一達者軀幹如丘山昨朝
猶啖肉今夕俄奄然官高亦何用有壽差直錢從此心
所願仰面惟籲天官乞常落後壽乞常向前更乞早還
鄉不待步履艱放舟日臨水策杖日登山筋力幸強健

何必駕高轍此願如我遂俸祿皆等閒

雪中對竹

平生此君子夙好似相敦昨乘暑雨過移種向東園衆木經秋落黃葉亦無存獨此瘦骨爾日午陰猶繁天公故歷試夜來雪翻翻雪落洗其葉雪消溉其根顏色愈覺好青青映園門高節默自持難與俗人言

板屋二適

負暄

朝坐見日升夕坐見日落午坐日更多煖氣如火灼陋
居類田家不省在城郭高樹凡數株黃葉被霜搏何曾
遮陽鳥更復聚寒雀旁不敢窗扉前不垂帳幕久背真
可獻此語非善謔昌黎却避景遷坐身屢作我幸無此
勞竟日不展脚自我有此居綿裘不重着自我有此居
火爐但高閣冬日何可愛可愛更可樂

對雪

大方本無隅虛室自生白吾屋初落成老莊言不易白

也從何生有物皚皚積空園何所見怪石惟露脊誰寫
偃竹圖須帶鶴在側平鋪得奇觀寒氣亦漸逼展席坐
稍深蒲團閣雙腋旁無一木支上止片板隅端愁厚將
壓却喜輕似擲階踏鳳沼詩案堆兔園策鄙性自不飲
泥甕久不坼淨掃但烹茶此樂更甚適

送陸全卿赴浙江副使

豸角冠高映赤墀衆中才操許誰知人登臺省誇何易
子去江湖恨不遲親舍相望通色養泉司爭喜覩風儀

春來獨覺門牆冷老大空搔兩鬚絲

送羅編修擢南監司業

舟引薰風好算程江頭立候總諸生一章再補賢闈缺
六館先期士類成路入石城瞻虎踞山臨壁水聽雞鳴
曾聞南國游歌慣不厭長街振鐸聲

答鳴治乞花二首

北牖新開忽好奇庭中艸木最相宜誰知小圃春風後
只有酴醿三兩枝

池上朱藤總看花飛虫繞屋類蜂衙何如枉却公來賞
况有新醅不用賒

再答鳴治乞花不得二首

新暑蒸人屬夏初恨無花送強分疏朝來北牖多生意
想見庭前艸不除

城北相望見面遲只將新句乞花枝花枝乞得成何用
自是堯夫要作詩

待鳴治過園居

西街何處踏黃沙
未午空驚樹影斜
掃地頻教除短徑
臨風獨坐數飛花
行來雙闕應相近
望入羣山幸不遮
自笑貧居無欸曲
只呼童子預烹茶

鳴治至次前韻

空庭雨後少塵沙
委巷迢迢轍蹟斜
休沐有期能致客
借看何處更移花
綠陰覆地禽相語
清水盈池樹半遮
四月江南無使到
宿醅聊可當新茶

送吳克溫赴南京翰林

綸閣花香日影浮薦章爭喜得名流虞書初進東宮講
唐典猶從北館修家慶及時開壽域官清盡日在瀛洲
安能便趨僂舟去南望金陵是舊游

聞家園樹為去歲風雪凍死

我家冬青樹百株先子手種東莊上年深鬱鬱丈餘高
能與東莊作屏障我家木犀樹兩株亦復團團高丈餘
少時我種東園裏猶憶此地稱山居嘉樹我生好怡悅
家僮寄書來報說園林遭厄家家同去歲何期大風雪

冬青根遠猶且瘁木犀葉落仍不發其餘橘柚與篁竹
畏冷固宜難盡活吳中三月春已殘生意蕭條如十月
嗟哉氣候何如斯老人自言未見之樹埋厚土裹以皮
凍死尚作枯柴枝東南民力盡徭役無衣無褐死可知
安得麤布數萬疋盡為此輩遮羸肌傷心偶賦凍樹詩
詩成敢告良有司

得仲山德州所發書云去京師陸行只三程恨
不能一見是夜園居對月悵然成詠

使車停處發郵筒消息年來喜易通疋馬三程岐路近
兩人千里月明同園名屢易常為王酒量難添已作翁
信是無由能縮地歸歟須約故山中

園居續詠

藤障

步當斜徑緣成圍賴有長藤葉不稀可恨刺蘚枯朽盡
向來行處慣鉤衣

花門

新開小徑傍西垣手種酴醿花已繁不似陶翁園日涉
門雖設處却開門

榆籬

不勞細竹倩人編亂插榆秧犬莫穿坐待兒童爭采食
高枝春盡欲生錢

艸徑

翠繁綠縛不知名石甃中分一徑行行處莫言人蹟少
青苔踏破不曾生

簾屏

長條抽綠綴紅雲園子新從雨後分板屋向南將樹塞
莫譏管氏儼邦君

樹屋

薿薿光浮葉皎空舉頭惟有碧雲蒙夜來雨漏牽蘿補
圬者安能復食功

晝聞鬼車

五月廿七日陰雨中

古燕氣候異陰雨近何多惡鳥啾啾鳴高飛升么麼夜

嗚已可怪畫出當如何爾亦豈虛出出必事無他鶴鵠
載常棟鳳凰見卷阿歐公詠鬼車可作安可歌弋人亦
慕此將謂是駕鵝獲之可以獻野外欲張羅

送李郎中擢應天府丞

名堂嘗辭傳奉之命故有此擢

清班級立色無慚工署徊翔意自堪名屬山公終啟事
身從韓子不臺參舊開輔郡依江左遙望神京傍斗南
壯歲要知功業盛看君黑髮正勝簪

自六月初七夜乘涼看月後每夜有月輒賦一

首

此夜看新月亭亭正向西光因藤蔓少影與竹梢低千
里誰同賞三更我再題明年相見處約在越來溪

初八夜

此夜仍看月清光稍覺多兔豪纔閃爍桂樹漸婆娑還
傍西樓隱應從北闕過坐來貪看久更問夜如何

初九夜

此夜仍看月人云是上弦形弓三尺直青鏡一規圓光

借無全日疆分。豈半天幽都近遼海。始覺地形偏

初十夜

此夜仍看月。陰雲未撥開。還教童子侍。如待故人來。多病須靈藥。常醒只耻罍。清光不相負。依舊滿書臺。

十一夜

此夜仍看月。黃昏始正中。樹多增目睫。天闊蕩心胸。暗室明於晝。銀河淡若空。爽然消暑氣。身到廣寒宮。

十二夜

此夜仍看月胡牀坐稍偏清風還共至良夜未須眠庭
際懷丹桂池中見白蓮平生無所好對此輒欣然

十四夜

此夜仍看月看時却向東影懸真載魄光暈類重瞳偶
值青林缺還當玉宇空何須論詩識范老句偏工

十五夜

此夜仍看月真從海上生金盤承露濕玉鑑掃塵清詩
句憑誰和菴居為此名人心當自識天道豈常盈

三姊壽七十以八月十三日生因題月兔圖奉

賀

橋頭水滿月流輝誤悅高堂映綵衣節賀中秋今已近
壽期百歲古尤稀門闈舊傍金獅壯宅在金獅巷北圖畫新成
玉兔肥小弟相看俱老矣願為羹粥正懷歸

為陳玉汝題啟南山水大幅

馬家作畫纔一角剩水殘山氣蕭索畫苑馳名直至今
輸與毫端不浮弱此幅壯哉誰寫真吳西山水見全身

行春橋上曾遙望待樂亭中好細論

鳴治種荷無花見予所種亦同有作次韻三首
幸免花開重賞花近來多病早休倚高荷亦自知人意
盆底移花過別家

翠蓋亭亭已早枯紅衣點點定西湖試看一勺盆池水
此日無花也合無

野花次第隔籬開不待園丁着意裁莫向濂溪論氣韻

還輸康節識根荄

老病二首

七十嗟無幾難教病不生已孤君相意莫慰友朋情畫
寢安逃罪朝吟久絕聲吾衰忽如此更苦入朝行

數日冠裳解依然一老生看花無自力養鶴少心情夜
月勞延坐秋風感作聲近來添老景腰痛況難行

奕姪構二亭于東莊一在振衣岡名看雲一在
曲池旁名臨渚以書來報待余歸休與諸老同

游喜而寄此

爾父西菴扁拙修當年種樹帶平疇近聞肯構為吾計
有待歸休與客游山上看雲依鶴峒園中臨渚對桑洲
只憂步履非輕健更欲池邊置小舟

病臥玉延亭

高臥真如隱士閒病來受用未為慳平池積水從消長
盡日清風自往還短杖好扶宜野步小冠初着稱衰顏
直須歸到吳城下新構幽亭況兩間

謝朱懋恭同年寄龍井茶

諫議書來印不斜忽驚入手是春芽惜無一斛虎丘水
煮盡二斤龍井茶顧諸品高知已退建溪名重恐難加
飲餘為比公卿苦風味依然在齒牙

題墨竹贈李尚書時雍赴南京二首

司空德望重同袍直自黃門到戶曹總道南都優老地
更看晚節傲霜高

三十餘年契義心白頭相與戴朝簪南行翻喜清風近
來歲吳門候好音

王廷亭晚坐

殘暑酷憐何處同只將河朔比江東半規新月未全白
一穗幽花仍澹紅鶴步臨池應愛水蜩鳴抱樹似呼風
客來只勸秋涼出無病無官豈邵翁

惜月效白體

入夜見何物既圓且復平空懸無所繫忽從東海生以
彼比金盆金盆無此明以彼比寶鏡寶鏡無此清所恨
容易缺每憂不常盈況復當盈時或不值天晴又為日

薄蝕仍被雲縱橫陰晦時每多清明能幾更所以尤愛
惜對此難忘情我欲告上天高高鑒微誠天有日與月
譬如兩目睛使夜或無此天目一已盲盡掃諸浮翳一
旦驅天兵不論晦朔夜常從天上升當令仰見者無不
騰歡聲

有感

唧唧蛩鳴夜喔喔雞鳴旦惕然發深省二物如相喚茫
茫開闢來一元過強半人身與浮沉世道分治亂吾生

處其間一息真可歎寸心冀無怍此外奚足算

送張濟民擢知思南

豫章已作甘棠詠潞渚初從貴竹行萬里思南稱上郡
寸心拱北望神京緋袍金帶娛慈母阜蓋朱旛候遠氓
他日漢家循吏傳虛名應不比王成

新製方竹杖

紫玉新裁恰過肩斑斑四面帶湘煙病軀藉爾能扶直
巧手煩渠莫削圓世事固知方則止時人應道曲能全

此生得免模棱誚晚節相依尚挺然

夜坐聞砧

何處疎砧隔短牆東鄰有婦搗衣裳風林落葉秋聲動
露艸鳴蛩夜氣涼久別官寮忘館閣每從兒子話家鄉
強扶筇竹歸深院半壁殘燈獨上牀

中秋風雨

都人期賞月此夜合家歡市上人爭送豆瓜堆滿盤那
知風雨至失却此團圓天公亦戲人人情苦多端陰晴

詎可定感此發長歎

和石田題王濬之畫扇二首

尺圖宛見狄溪春我昔經行記得真欲作畫評重閣筆
只今還屬當行人

紫藤花落石臺春隱者幽居寫最真畫品平生應自定
何須延譽待他人

病中讀周益公集以術家謂其身坐磨蝎宮宜
退不宜進寬命與公偶同所愧名賢德望不及

遠甚其退尤宜因詩紀之二首

術家早已論身官淺薄安能比益公止豈人為當有命
退如時序況無功過從却愧高車滿請乞惟憂短疏空
忽報南方風雨甚病懷猶自望年豐

益公論命居磨蝎歐子作詩思潁州合志不須分後學
乞身將復顧先憂買田負郭甘供稅種樹臨溪擬泊舟
更欲范村從一老月中常作石湖游

詠荆墩

錯節盤根地底埋野人發地作枯柴製來礮碗俄登席
送到蹣跚忽上階曲几異形休用斬胡牀同類亦教排
識荆已遂平生願隅坐相依稱小齋

詠胡牀

座上斜撐三尺牀病軀隨意與低昂睡來有枕還成夢
不用烏衣作隱囊

煮栗粥

腰痛人言食栗強齒牙誰信栗尤妨慢熬細切和新米

即是前人栗粥方

讀韓文公瀧吏詩

自古東吳游宦鄉愁聽瀧吏比潮陽蘇公亦是南遷者
長作嶺南人不妨

招曹良金飯

曹君履憂患顏色何欣如學道想有得委命心常舒屬
以公事至翛然寄僧居行裝止詩卷一僕身與俱西城
隔風雨遙念夜堂虛自剔長明燈開函看佛書寔予負

老病秋至歎歸歛坐上無清言何人能慰予明須就我
飯已摘園中蔬

題墨竹贈良金還東昌

此日此君何所往聊城聊避洛京塵清風到處難移節
好雨來時更潤身

九月十八日大雪又十日雪益大作秋雪歎

吾生本江南不慣見秋雪見之自北都都人亦不說初
偕雨兼零忽逐風急刮漸看瓦溝平仍畏石城滑陡然

作寒威貧家執難活米炭幾時儲糞鹽何處幹以至衆
曲身况也無衣褐病體强自支憂世亦頗切茲事已兩
見浹旬未遠閭月令不深考政事何所缺惟天量有容
陽氣終奮發赤日中天行窮簷偏昭晰涼颸只淒然勿
遽變凜冽霏霏嘉瑞成却待嘉平節

次韻濟之齋居苦雨

病臥三月餘幽憂滿懷積索居當杪秋更為雨聲迫淙
淙瀉空階豈但作點滴緬懷同心人恨不坐連席齋居

掩公署紀異稽史籍向來明月共數步東巷隔及此遙
相望南箕與東壁寄示苦雨篇此意吾已識黃葉濕還
飛穿窗破愁寂

韓貫道示所和復次韻答之

宿禽噤無語落葉紛欲積入夜雨不休愁思為促迫作
詩寫幽懷累幅空研滴嗟公久鯨居所恨誰暖席夜長
如僧齋名但挂朝籍坐念西署清遙如千里隔闌風仍
送雨夢覺聲撼壁垂頭坐牀下童子何知識八荒同一

雲杜老感幽寂

送楊溫甫郎中出守杭州

刑曹已脫簿書忙
劇郡新除又古杭
雪後遠郊驅五馬
川中名族數諸楊
白公石在官初滿蘇子堤成姓共長
莫信一麾俄出守
前賢遺愛自黃堂

竹田東莊諸景中之一也長姪全取以為號使
來請一言予喜其不忘舊業也賦近體一章遺
之

斷橋流水接村墟中有脩篁一畝餘附郭久為先世業
築塲宜共此君居屬萌不斷留嘉種結實能收助宿儲
幸免輸租同歲晚子孫常願把犂鉏

杜東原畫為齋姪題

溪上悠悠西日沉炊煙生處萬山陰試看畫筆隨人老
此幅吳中何處尋東原有私印曰筆隨人老

又為題沈石田畫

高峯玉立勢亭亭石罅長松數寸青儒雅堂中還講業

案頭終日對遺經

夏太常墨竹卷為楊郎中題

友石山人去不還派傳墨竹在崑山長身迥出雲煙外
疎影平分水石間管列笙竽陳雅樂聲回環珮入清班
此君此日常相見種處從今手可芟

紀賜

十一月八日東宮輶講內出衣帶徧賜官寮皆加一等寬得雲鶴衣三犀帶一愧感

之餘以

詩記之

中官高捧出彤闈詔賜宮察帶與衣雲鶴豈勝彎背着

花犀仍向病腰圍受來臣職將何補持出君恩不可違
章服在躬元不稱平生加等復何祈

楊惟立以南京吏部考績至京留修會典書成
覩卷首與予聯名有詩志喜次韻答之

令甲紛然合百司校讎何幸得同時北門再作冠裳會
東觀常將筆研隨漢祖三章垂約法唐人六典費精思
煌煌一代新編上名在盧前愧莫辭

又次韻惟立奉天殿進會典

時十二月十一日

綯帙裝成進御初綵輿僂樂下東除史家未許依唐典
冊府空聞紀宋書陛楯交陳雲氣繞殿簾高捲日華舒
子雲筆底多清興欲和新篇恨不如

又次韻進會典明日賜宴禮部

喜動龍顏覩巨編禮曹開宴特傳宣祖宗政令侔三代
文武公卿合一筵遷史僅終天漢事周詩宜有鹿鳴篇
玉堂歲莫多嘉話烏帽宮花席更聯

次韻鳴治歲暮有感

石湖住近萬株梅
買得湖田苦未回
都市每驚風俗改
老人偏覺歲時催
客居顧我聊兼隱
仕路憐渠更用媒
頭白相看知已在方山
屹立勢難頽

家藏集卷二十八

欽定四庫全書薈要卷一萬六千七百五十八

集部

家藏集卷二十九

明 吳寬 撰

詩三十七首

癸亥正月九日以張廷式工部自易州分司來
初作同年會于李時器宅時器出松竹梅于盞
云歲寒三友人各以一物自擬復相倡和

京國重臨十日春同年寥落是壬辰合成松竹梅三友
歷盡冰霜雪一身談劇欲更庭下僕飲餘不醉座中人

白頭却歎吾偏老坐對杯盤意轉親

三人皆不飲

十四日再會予家

雅會新年喜再成過門冠蓋見交情深穿委巷春風暖
高出疎林海月清唐國太康原有戒齊人同好不重盟
歲寒高節真堪取三友相看官負名

二十日三會廷式公館館即楊文敏公朝房所

謂聚奎堂也

積雪全消春載陽上元已過月初長城中燈假何妨滿

社裏詩盟不可忘三友自成聞喜宴五星猶仰聚奎堂

明朝易水遙相望強向筵前更舉觴

儻松

朽株千尺傍林臯縱受寒風不怒號老去竹梅長作伴
春來桃李獨分曹材充清廟難為棟賦就中山且作醪
今日會中邀入會百年高節願同高

和廷式儻竹

翠榦青枝玉削成翛然誰識此君情根盤瀼瀼鄧山遠

影帶蕭蕭易水清雨潤何妨還改色歲寒能保不渝盟
枯松幸託同心久相會無勞問姓名

和時器擬梅

冰雪生香畫未成相看綽約更多情竹君比玉姿偕美
松老如柴骨不清詩詠逋僊甘獨隱譜修范叟愛同盟
從來能作和羹用早向商書已識名

絕飲

平生不能飲常愛能飲人三杯已至醉陶然見天真淺

飲分數酌夕宴可自晨流連至終席尚可陪嘉賓近者
患齒痛痛處蓋有因酒入咽喉間其氣烈且辛遂令痛
作時難合上下酿酒乃天美祿分定于人身天欲絕吾
飲何必言諄諄惟令痛及齒不使沾其唇空庭滿冰雪
寒氣加新春對酒不能飲天意豈不仁不為酒所困庶
免書諸紳

聞雞

繁星滿春空雞鳴鳴不已試問鳴何爲意在喚人起攬

衣不能眠人各勤所事士人爭入朝商人爭入市惟有
怠惰人翻嫌聲聒耳殺其善鳴者入庖執刀七雄雞職
司晨不與牝雞似牝雞鳴聲低豈識司晨理不知家之
索顧以聲可喜枕上偶聞雞感歎為流涕

新歲與玉汝世賢禹疇濟之為五同會玉汝以
詩邀飲因次韻時玉汝初治楚獄還

朝班常喜接鴛行束髮同游自故鄉獄事不寬如定國
歸途無險勝王陽三江已隔非吾土五老安知共此堂

更待城東春色好小園還約看紅芳

書室曉坐

南窗兀坐日光浮殘雪猶看在瓦溝畏冷又過冬一難
覺哀真合古三休使人强以家書附多事閒將日歷修
喜報聖躬膺萬福南郊擬從六龍游

二月四日上出視朝志喜

鳳樓高隱五雲端鐘鼓聲傳列奉鑾世道已登三代盛
聖躬常繫萬方安殿前旭日天仍近仗外春風樹不寒

仰見赭袍陞黼坐千官擁笏盡騰歡

是日百官皆具公服朝見

次韻鳴治見懷

層軒孤榻在此地豈吾廬星彩三更滿風威二月初河
永清毓毓宮柳翠疎疎詩自昌黎後惟公更押於

郊祀與楊惟立寓宿神樂觀馬道士房

翰林前輩多於於

宿此齋

僂房地迥步頻移影澹西窗落照遲舊日諸公無在者
新年老友更同誰坐深蠟炬當筵剪聽徹鸞笙隔屋吹

便欲聯名題壁上郊齋須記仲春時

日煖齊宮賜食頻曲廊連步得楊津卜郊此日非三望

陪祀誰家有四人

楊氏有惟立及大理卿守隨兵部郎中守偶刑部郎中茂仁四人陪祀

展卷鑒書誇茂密

惟立携宋仲珩書見示

開函投句愛清新

是日李世

賢屠元勲皆有詩見投

憶從史局曾相別却向僊房得更親

次韻屠元勲陪祀

南郊春半喜新晴盛禮初從改卜行刑獄仍令司寇禁
祝詞先許奉常更

改時維仲春陽氣發育

酒傾玉瓊分三獻樂奏

蕭韶合九成衰病不堪陪祀列仰瞻袍笏羨光榮

送玉汝擢副都御史仍赴南京

南都人識舊清風
新命仍歸玉敕中
執法星高依斗北
留臺地重隔江東
睢陽會散誰偏老
洛下吟成我未工
欲忘離情須是醉
當筵休放酒杯空

園中一鶴長鳴羣鳥時噪其旁若相語然因觀
白集有烏鵲贈答之作輒效其製為四絕或者
能道其意非特所謂自取笑也

烏問鶴

爾脰雖高不上天
爾軀雖大却楞然
小園半畝門常掩
獨舞孤鳴待幾年

鶴答烏

結巢長比鳳如鵠
阿閣雖高性不貪
試待明年毛羽長
一飛直到大江南

鶴問烏

緇裳玄冕不分明
聒耳爭嫌擾擾聲
爾自上林能攫食

如何來此欲通名

烏答鶴

飽食橫飛不願餘彈來能避翼能舒終年只向空園住
不會謀身不似渠

謝馮副郎送惠山泉

何處泉滿腹惠山橫翠屏山遠不能移誰移此泓渟客
從山下來遺我泉兩瓶磊磊石子在中涵數峯青宛如
清曉汲尚帶魚龍腥煎茶水有記陸羽著茶經舌端辨

清濁豈但如渭涇茲泉列第二不甘讓中冷幸蒙蘇子
詠將詩作泉銘至今山游者爭仰漪瀾亭遠餉踰千里
覩艤載吳舲後人不好事此事久已停大甕封泥頭所
重惟醯醢一朝俄得此高屋驚建瓴陽羨茶適至新品
攢寸莛雖非龍鳳園勝出蔡與丁二物偶相值活火仍
熒熒蟹眼泡漸起羊腸車可聽煎烹既如法傾瀉散蘭
馨連飲渴頓解更使塵目醒餅底有餘瀝照見髮星星
嗟此一段奇何意當衰齡不須茶始飲飲水心常惺未

足酬雅意聊用報山靈

題西戎獻馬圖贈楊應寧都憲督理陝西馬政
烏駒曉渡黃河來蹴踏萬里風沙開四蹄垂鏃不可鑿
拳毛繞腹非凡材戎人牽過蕭關下毳衣韁帽胡為者
不辭馳獻到關西聞道楊公來主馬平涼極望水艸新
監苑重開列圉人此疋真為渥洼種隱起龍文猶滿身
馬復令行如詔旨蕃恩應着錦雲比唐家莫說惟毛仲
秦世徒傳有非子內地養馬連長槽斟水莖艸民何勞

楊公一來壯兵氣萬騎逐北天山高單于夜撤穹廬遁
馬政既成公入覲還將此疋獻天闕不是按圖空索駿
應寧示贈行諸作題其後

溽暑不可耐三伏且未闌琳館遙相望出門一何難況
也值連雨道上不曾乾雨多亦自喜客去幸盤桓試看
何所得詩卷滿牀攤西行良足慰躍馬過長安仰瞻太
華峯俯挹黃河湍驥牝散郊野監牧紛奚官嚴霜被百
艸邊城驚早寒懷人當不寐明月中宵看

題米南宮詩墨

靳充道藏

向晚得奇觀案有翰墨陳展卷即可辨迥然出風塵尋
常勢欹側此幅殊不倫字止五十六端人似垂紳復如
旗正正又若車轔轔書家有定論俗士妄生嗔不見蘇
公語超妙仍入神公昔家京口海嶽近為鄰墨蹟多散
落至寶終難堙璧言彼荆山玉旁達見字尹驚者忽入手
幸矣歸鄉人百世恐朽敝摹勒須堅珉銘文配瘞鶴終
古焦山垠

為潘時用博士寄壽其叔父鶴溪太守八十

閩南歸老二十年鶴溪先生健如前却杖放步登山巔
上下與鶴同蹁躚眼明不著養生編試問先生何以然
口碑曾聽閩人傳有守以來公最賢窮簷小民蒙見憐
舉手加額每祝天願公居家年百千翰林從子今儒僕
竹林南望歸無緣我為封詩到壽筵和我妙句篇須全
勿令邠老美獨專

讀蘇集有除夜詩首四句云行年三十九勞生

已強半歲暮日斜時還為昔人歎蓋述白太傅語也後蘇公年止六十五而自公七十六予今年六十九適介其間因自賦以寄鄙懷

歲暮日斜三十九更加三十又何如勞生強半蘇終少視古猶稀白有餘學士仍兼慚老學書生未敢望尚書平生却恨張師德能保虛名不是渠

次韻友人海昌對月見懷

懷僊不信有瀛洲汙漫真為此夜游浮世縱觀俱是海

高人獨立最宜秋，髮晞清露如新沐。
手挽銀河欲倒流，却向君家誇故事。

羽衣明月倚黃樓

寄壽趙完璞八十時得人治盲目復明手書示

報

憂世非私百畝田，上書當道憶當年。
高歌行野仍三樂，妙術傳家是十全。
玉璞獨完雙足在，金劍輕刮兩瞳懸。
年開九袞休言老，手蹟封題尚宛然。

新麪歎

憶昨城西路歸來
背夕曛荒荒麥未割
極目盡黃雲黃雲
方滿郊都無一日別
如何盤盂中忽復堆白雪
乃知昨所見總是豪家莊
匆匆謀一飽豈似野人忙
年老重食新感歎繼以泣
何不遲數朝垂芒蒲珠粒

登廣福寺佛閣望西山

城中過坊口時見山一面車塵半空起
忽復不可見今日出城西初喜見山便恨當長夏
時艸木更葱蒨遮胸如執圭隱首或側弁行
行七里餘勝地得僧院仰瞻何

突兀傑閣俯高殿百級躡層梯身向西闌轉橫絕曠野中
蒼翠爭自衡已將目力窮却任脰骨顛羣山不知名起
伏端可辨勢從西南來遙向西北旋萬馬如馳逐陣列
如鏖戰白雲與碧靄巖姿陡然變誰倩丹青人為我展
畫卷老至客京華宦游真已倦若使入山行所歷豈能
徧一覽青可了無如此中善

次韻謝鳴治初入館修史纂之作

儒官職業敢終辭猶幸相從得故知聖學仰承慚薄識

史編旁考惑多歧極知古事能為鑑甘比闢工但築基

四庫大開還自喜老來纔免借書癡

中秋夜與葉翁飲

天淨真如海不波依稀倒影見山河却嫌羣木交加甚
只恐浮雲點綴多此夜浙江潮洶湧去年燕地雨滂沱
一樽更與鄰翁飲老至佳辰肯放過

感范魏公食粥事

長白山中蓋粥冷丹陽道士麥舟空故人他日能施惠

君子當時已固窮

翰林新修工畢適奉命教庶吉士坐久偶成
仰見沉沉畫棟連坐當華屋是何緣朝廷正用儲賢士
山澤安能置列儂水激長隄聲若瀉日臨高樹影初圓
自憐老眼渾無見亦愛新涼對簡編

題米南宮水墨圖

閔尚書藏

雲山煙樹總模糊此是南宮鶻突圖自笑頂門無慧眼

臨窗墨蹟澹如無

米自跋云非具頂門上慧眼者不足以識

幼從鄉校託交游東髮相看到白頭我愧濟南非伏勝
人言吳下有施讎高懷已見開三徑遺愛猶聞在兩州
少待登堂成一笑手持春酒獻還酬

斫蟹

斫鱠曾有人斫蟹始自予蟹也我所欲所欲寧舍魚南
人無不食水族到蠅蜍風味覺斯下至美當輸渠今歲
美且淺不待霜降初鼎烹本何罪連收同族誅我老齒

將落兩螯奈偏腴手持但垂涎頗亦晉人如薑醯既登
案聊間以嘉蔬一斫即可斷大嚼已無餘所恨性不飲
右手猶自虛晉人定相笑醒然一何愚口腹為小體養
之愧軒書惟應知味者或取斯言歟

家藏集卷二十九